

上高縣十卷七

知縣事古閩林元英纂輯



名宦志

水懦民慢火烈畏之濟寬糾猛敷政攸錫古道院

敖最易治正由撫字弗利繭絲攜持地孰佔於危

殊井表宅孰貢於亦龔黃不茲遺愛遺直

並承編公作一宦志

宋

李懷道元豐中知上高縣始至建學官不逾年執經而至

粘當作帖



者數十百人爲政不苛而民肅賦役訟獄不諉其務蘇  
轍以爲有古之道其所以得民者非復世俗之吏蓋紀  
其實云祀名宦祠省志

李公彥臨川人大觀己丑任知縣誠心民事嘗兩遇旱躬  
親祈禱皆獲優渥歲以大稔民爲勒其事於石

雷孚字保信新昌人紹興六年以進士攝縣事純厚清白  
尙義禮賢歷官俱有惠政民咸思之

黃輔之乾道辛卯任知縣居官有節操苟得爲必爲之邑  
旱災將請盡蠲民賦有異議者輔之曰縣令字人之官

也不損猶應言損况真損乎吾寧得罪州郡毋得罪吾  
民以旱狀上州郡怒乃上章自劾朝從其請祀名宦祠  
新劉志

游少游建昌人淳熙間以進士任縣丞賦性敏悟文籍一  
覽不忘嘗衡文廬陵前此試官事甫竣必間道疾馳少  
游獨徜徉累日且作梅花詩十章謁周益公大蒙稱賞  
士子出孫山外者率以去取叩詰應乃如響衆皆語塞  
而退舊劉志

李揆瀏陽人紹熙庚戌任知縣政修民悅訟簡庭虛日以



吟咏自樂有太平官府元無事聊放衰翁半日閒之句  
邑人至今樂道之擢中書舍人舊劉志

鄭師尹括蒼人紹熙壬子任知縣爲政近古修舉廢墜不  
憚勞費縣令舊無題名師尹始輯而記之建槐堂於治  
之後堂卽今縣宅爽塏軒豁皆其所規畫也府志

曾噩字噩甫福建閩縣人學問淹貫文章高古兩應詞科  
人以博洽稱之慶元戊午任縣尉贊政有聲新尉廳作  
題名記尋陞廣東漕運使

芮及言字子及雷川人嘉泰三年任知縣精於吏治勤謹

嚴肅不輕假人顏色闔縣憚之號爲小監司嘗書座屏  
曰少飲酒飽喫飯勤出廳公事辦涖官四載終始如一  
去之前一日猶痛懲黠書聞者悚然見通志

趙伉夫字尊道雷川人開熙乙丑任知縣內腴而外癯政  
尚慈怒不爲橫歛民懷愛之目爲趙佛子踰年事簡政  
成人爲樞密院都承旨

黃伯固字子堅福建將樂人嘉定己巳任知縣涖事精明  
剖決不倦要以抑強扶弱爲本豪奸屏跡案籍積弊搜  
剔無遺解任日剩錢三千餘緡留縣庫而去累遷至尚



書致仕祀名宦祠府志

馮椅字奇之號厚齋南康都昌人紹興進士嘗受業朱子得致知力行之學嘉定二年充江西運司幹辦公事適峒寇李元勵作亂王簡鄉帥本道檄椅計事卒平之四年秋來攝縣事先是邑令窘於上供逋負累積勢不可復為椅力請於部使者悉蠲之民困以紓浮虹橋圯捐貲修復又構詠歸亭於縣庠政事少閒輒延諸生署中親加訓誨士風亦為之變至今信賢縣尹必椅稱首焉

祀名宦祠府志 參舊劉志

張次賢字子齊僊居人嘉定辛未任知縣三年政成始營卒不屬邑轄往往橫恣民受其害次賢入朝首言及之反以論去未幾入為正言貽書新令趙汝笈請於朝乞重彈壓之權而已中主其事由是知縣兼轄兵馬邑人德之祀名宦祠舊劉志

陳有聲字廣宗福建長樂人嘉定壬申以進士任縣尉政簡刑清吏民安之教士子以作賦之法後宰宜春有治行祀名宦祠舊劉志

夏祐浙江永嘉縣人嘉定乙亥以進士任縣尉廉介自持



州縣有委一斷以公有故人當路從未通書嘗謂人曰  
仕途奔競相率成風吾竊恥之窮達有命豈可枉道求  
伸耶舊縣志

饒虎臣字伯武寧國府人嘉定間以進士任主簿丰神秀  
整音吐洪暢勾稽之暇手不釋卷瓜代且至郡檄攝教  
事月書季考大愜士心尋擢國子監丞府志

趙汝笈字景師四明人嘉定戊寅以進士任知縣資稟明  
秀政尙清嚴待士以謙斷獄以恕諸司疏其治狀爲諸  
邑最先是諸鄉額有坊塲許人買換名曰教練每一名

四季認白納錢少者不下百千民不勝擾笈力申朝省  
遂罷之祀名宦祠明一統志

李日邁字伯行湖口人嘉定辛巳任知縣器度凝遠博學  
多才凡天文地理陰陽醫卜諸書悉探精奧禮士愛民  
雖政尙寬大而吏不能欺後擢監察御史猶爲邑奏除  
茶課紓民困焉祀名宦祠舊縣志

嚴宗字宗伯贛縣人以詞賦登進士寶慶丁亥任主簿敦  
行力學士多從之遊秩滿漕臺以試官闕留宗校文旅  
寓蕭寺有富家子欲鬻舉因寺僧請致錢五十萬宗笑



曰爲我呼來議之既至此之曰貢舉國之大典公卿大夫由此途出汝輩不潛心力學乃欲賄得之乎其人愧赧而退且申漕臺乞廻避人皆服其公廉府志

江湘新昌人嘉熙二年任知縣博學能文練達治理始至邑卽請於安撫使吳因蠲免積逋六萬餘緡前此民以賦急預借青苗田租凡數千石湘在任賦不踰期無復預借者庚子春水荒發倉平價賑糶民賴以活又贍學有田無告有養葺廨宇創傑閣新浮梁築陂堰廣灌溉因所利而利民者不可勝數旣去人懷之特廟以祀今

祀名宦祠府志

元

吳文郁鄱陽人後至元己卯任知縣嚴肅政紀雅重文學學宮圯撤而新之緇黃侵學田者數十年毅然剖歸士紀其績舊劉志

胡泰字志同奉新人元末由舉人任教諭旣而避亂袁州明初徵不至日與劉豫父輩作詩文書畫以自娛知縣黃權嘗寄詩有日相別未多日相尋勞夢思更求四幅字要寫五言詩



明

黃權

省志作拳

字公衡天台人洪武間以秀才任知縣始至縣

適值旱亢有言裏陂溉田甚溥而工築甚艱權力修復之歲連獲重修學校每三日進諸生親與講論凡壇壝廨宇有敝陋者無不修葺後解組家居臨終有詩云他年化作遼東鶴重看敖峯錦水春邑人建祠祀之所著有永壺集行於世府志

魏希哲字原明蕭山人年七十精神不衰以歷練成應

薦洪武二十七年任知縣廉以律已明以燭奸盜賊屏

迹豪強畏威祀名宦祠子驥官至吏部尚書府志

余

府志作金

源淮安人舉材幹永樂元年任縣丞洩事精敏撫

民慈惠遠邇無不畏服後陞河間府通判府志

杜宗福建建安縣人永樂間以舉人任教諭嘗修上高縣

志今後學有所考據後擢御史晉布政使司舊劉志

張寬泉州人永樂間以大學士任典史廉謹自誓日惟蔬

食布衣愛民之心恒惓惓焉作事有法嘗董營造之役

千夫百役無一敢後者邑人至今懷之府志

周觀德東莞人正統間任縣丞值亢旱積誠祈禱烈日步



行四十里至蒙山起龍湫返未至城而大雨如注從者  
進蓋觀德曰赤地百里垂枯萬戶惟祈雨足今吾方快  
甚焉用蓋為冒雨至縣平地水深尺餘歲賴有獲府志  
謝綱湖廣巴陵人成化辛卯以進士任知縣操存不苟仁  
厚有餘先是學宮規模狹隘綱至重修明倫堂奉遷  
聖殿於堂左制度始豁然收觀累陞按察司副使祀名宦

祠舊志

吳一貫字道夫揭陽人成化辛丑以進士任知縣資性明  
敏勤慎廉能興利除奸吏不敢欺民無所擾累陞大理

少卿

通志誤  
作寺丞

忤逆瑾謫嵩明州同尋遷江西副使討華林  
賊有功進按察使每見上高士民如家人父子及行部

卒於奉新邑人為之流涕祀名宦祠

按廣東志揭陽作海陽

張壘字元器歸安人成化間以進士任知縣才堪應變心  
切愛民興學校均賦役節浮費弭盜賊善政不可枚舉  
而水蘖之操尤罕其儔時有新昌降賊譚尙武者假巡  
捕之職擾害鄉民壘密疏奏除之地方始靖累陞福建  
副使祀名宦祠

林堂字望由福建莆田人成化間以舉人任教諭慎以律



已勤以訓士三日一課諸生第其高下使知自勉始終不倦陞揚州府教授祀名宦祠

王佐字良輔浙江山陰縣人宏治二年以舉人任訓導毅然有守模範尊嚴雖隆冬盛暑日與諸生講論不懈以憂去祀名宦祠

徐淮

府志作灌

字東之武進人宏治十一年任訓導剛方穎敏通達國體詩文立就待士子有禮都御史林俊提學邵寶皆器重之後以母老乞休祀名宦祠

王文翰高郵州人宏治間以舉人任教諭博極羣書勤於

訓迪夙處同僚間未嘗有疾言遽色正德二年卒於官童旭字賓陽沔陽人宏治間以進士任知縣正直嚴明不徇權勢境內淫祠毀之殆盡壇壝公署煥然改觀皆其績也官至知府祀名宦祠

張紳字鵬舉直隸泰興人正德三年以進士任知縣才高學富論事迥出人表時逆瑾暴橫所在輒籍民產紳力遏之弗避禍害華林盜掠郡縣紳振肅兵威賊不敢肆召爲監察御史見通志

王以旂字士招江寧人正德六年以進士任知縣慈祥愷



悌禮士愛民時寧邸派幣物剥民以旂獨不應歲省錢  
數千緡修城池建社學百廢具興民不知擾華林賊熾  
以旂訓鄉兵禦之賊不敢犯尋內召士庶遮留舟不得  
進者數日累遷兵部尚書總督三邊視舊治有來謁者  
猶若赤子焉卒贈少保謚襄敏祀名宦祠 泰明史稿

張淮字景禹順德人正德丁丑以進士任知縣持重老成  
奸弊肅剔吏民畏而愛之尤銳意造士公餘輒與校閱  
詩文三載不倦文廟之有銅爵自淮始 府志

陸時雍字幼淳歸安人嘉靖癸未以進士任知縣資性明

決精勤吏治建便民倉纂水利志至今賴之累遷江西  
提學副使 省志

謝邦信字諭卿東莞人嘉靖丁亥以進士任知縣剛直不  
撓廉介自持尤加意學校教養兼至內召時行李蕭然  
圖書數卷而已

陳文獻字維策福建長樂人嘉靖丁亥以舉人任訓導清  
修砥行精研經籍日課諸生而啟迪之其業通明者多  
出門下後遷山東滋陽知縣

倪濯浙江平湖人嘉靖丁亥任訓導恂恂雅素動履不苟



始終如一卒於官士林慟之

舊劉志

黃詔廣東饒平人嘉靖戊子任教諭宅心忠厚禮遇諸生有古長者風遷鎮海衛教諭士臨岐不忍別焉

凌世華字天宇浙江山陰縣人嘉靖癸巳任訓導輕利重義士之貧者捐俸餘資之少而敏者教之益篤累任山

東魯府教授舊劉志

竇茂字文盛永平人嘉靖甲午任縣丞恕以臨民勇於除奸時所部有無賴少年四人肆行剽掠民苦焉茂捕得格殺之一邑稱快

府志

周包荒字元量興國籍莆田人嘉靖間以舉人任知縣資性端嚴泄政平恕下車釋奠於學見櫺星門木構瓦覆隘陋弗堪易以甃石規制軒敞是年大比舉二士咸謂作輿有賴焉

府志

卞懃字維勉湖廣枝江人嘉靖辛丑以太學生任主簿樸實廉靜知民疾苦會歲大飢民聚黨攘食誣逮實繁時有責其不盡報者懃牘諸庭柱曰秉筆之下民命係焉慎之慎之當道考之有官卑知守妻子不免寒餓之句民每頌之尋遷上海縣丞舊劉志



重修 二高果云 卷十  
十一  
陳廷舉字一賢黃岡人嘉靖庚戌以舉人任知縣清介不  
染修廢舉陞善政頗多甫下車卽採訪上高宋元舊志  
不可得於是毅然以修志爲己任禮聘名宿全教諭鄭  
廷俊蒐輯較正剞劂成書藉爲一邑文獻之傳功在制  
作宜祀名宦舊劉志

程威字以重四川榮縣人嘉靖辛亥任訓導剛直坦夷執  
正不阿每月課必操觚先之旋丁外艱去

鄭廷俊福建莆田人嘉靖甲寅以舉人任教諭師範端莊  
多聞博洽纂修縣志爲後重修者有所稽考其功大不

可沒舊劉志

葉禎浙江仁和縣人嘉靖甲寅任訓導苦心經學訓士有  
方鄭廷俊纂修縣志賴其校正舊劉志

程大廉江蘓長洲人隆慶辛未以舉人任知縣縣舊無城  
大廉謀諸通邑區畫百方民無勞累而四封屹然至今  
有倚城如倚程公之謠陞荊州府同知

吳達可字安節南直宜興人萬曆進士任知縣初縣役得  
邸報走宜興迎之其母出謂曰吾兒官爾上高惟飲上  
高水耳水外皆吾辦送後抵任一如母言歲餘調豐城



瀕行囑上高人曰縣治形勢殊勝但浮橋宜遷叢林寺  
 後羅漢石下蓋羅漢石在縣下居江之南學前俞家石  
 在縣上居江之北一雌一雄兩無間隔則精英濬發今  
 浮橋從中梗焉吾得終三年淹必辦此奈志不遂何然  
 終必辦此未可知也後由豐城行取授北道御史尋病  
 歸再十年辛丑起補原職壬寅巡按江西行部瑞州事  
 畢徑詣上高召前所識紳衿及後來英俊指示移橋方  
 向計畫經費出百金為助又以百金置學田贍貧士讌  
 譚三日而去累官至侍郎卒贈尚書宜祀名宦舊劉志

陳黉生字賡虞浙江餘姚人由進士任知縣治縣六載悉  
 心民事江西賦役頒行一條鞭法吏民稱便自上高始  
 蓋黉生之請也

汪宗文字四溟湖廣蘄水縣人由舉人任知縣以上高漕  
 南二米民運甚苦遂援他縣官運例申請得免歲省費  
 數千金年例編審各畝十甲之消乏逃絕者皆於其畝  
 十甲內撥補宗文乃將消乏已甚者即併入未甚者甲  
 而於逃絕甲註逃絕字為後來編審之例其他善政畱  
 福上高者尤多涖縣三載擢戶部主事歷官知府副使



致仕宜祀名宦

汪運光字心毅江都籍休寧縣人由進士任知縣上高多積逋催科艱甚運光抵任求言擇邑衿吳奇允等八事行之既又聞上高漕米糧道給單單籌八十一枝米八十一石較他縣單籌七十八枝米七十八石者數獨多詳請改給得允由是歲省米千三百七十石利溥澤深民尸祝之宜祀名宦

國朝

張畢宿字鹿園江南當塗人順治丁亥以進士任知縣時邑疲甚畢宿至審民疾苦題蠲荒糧暫免三年又知催科役追呼旬攝爲民患令撤夫置木皂隸民愛而畏之依限完納無違者高安秋陂坑號賊藪界毘上高羊陂坑兩縣苦其屠劫畢宿計致渠魁反覆開諭且給貲本使負販爲生賊皆感泣歸散其黨戊子二月金王變脅畢宿徙令臨川畢宿計將圖之隱忍姑就金王誅乃被逮尋辨釋舊志謂近時上高令惟畢宿列名宦無忝云易道沛字晴湄湖廣漢陽人順治七年以進士任知縣下車詢民疾苦申請蠲浮糧計官米二千五十五石民



米萬八千七石少差編審戶籍減消乏人丁萬四千有  
奇用除三百餘年逋賦之累公餘進多士躬親講藝月  
課詩文歲饑穀貴則捐俸轉糴活民無筭祀名宦祠

劉啟泰字純禧山西清源人康熙壬子以舉人任知縣上  
高縣志自前明嘉靖以來久曠不修明季屢遭兵火嘉  
靖間志存者亦無全帙啟泰慨然有志延邑舉人李爰  
漢況文英劉應騰等纂輯成書補嘉靖以來典章之闕  
龔其裕福建閩縣人以本府通判攝邑篆時秋逆煽亂上

高殘破其裕外攘內輯捐俸代償逋課及題豁荒逃下  
賦俾流亡得以次復業上高水涸舟少胥役託名兵米  
索賄賈航致舟楫不通飛輓為艱其裕以平價僱募著  
為令又漕米收差每米一石索費銀一分其裕革之其  
他便民之事不一而足祀名宦祠

按二劉志未為立傳今采毛遠清理漕務記補敘  
莫之翰湖廣潛江人康熙戊午由進士任知縣先是上高  
苦浮糧者三百餘年至

國朝始獲汰免第糧減而里甲未併役重差繁受累與浮  
糧等崇禎十五年邑人黃鼎彝等具疏通政司請併徭

重修高縣志卷七 名宦



國多故議遂寢後無計及者之翰下車力請於上併里革費民享其利甚溥邑人黃于象作詩頌之宜祀名宦

按此事大有關係舊志失載今采黃于象詩補敘

嚴開禧分宜人康熙間以歲貢任教諭日以躬行實踐砥礪諸生又修葺廢墜不憚勤勞學宮之左舊有青雲樓从圯倡捐建復改題曰奎壁閣闔邑人文賴之

王樾字文重號震來貴州黃平人康熙庚寅以進士任知縣先是邑有裏陂明知縣黃權修築然水勢湍悍積久頽圯後來者屢議興復卒不果民恒憂旱樾至首以爲

務經營圖度行之以斷陂成灌田四十餘頃至今賴之事詳水利志他如改建文廟立義學首命月沙洲種樹培補學龍縣龍之被殘毀者復爲之厲禁而置買義塚地尤澤及枯骨涖任兩載百廢具舉惜以艱去邑人思之祀於裏陂側之通源菴以菴故樾所建也宜祀名宦劉承莆號逸叟四川閬中舉人雍正六年以高安令兼攝邑篆會赤旱農民哀號請命而大府催科方急承莆與邑衿盧從志商權徑請緩征獲免本年錢糧三千二百兩有奇仍發常平賑濟不足則捐俸轉糴民免流亡



萬元臣號敬所南昌人優貢生任教諭學術純粹師範尊嚴遇貧寒則飲食教誨兼任之

王錦浙江人乾隆元年任典史素性謹飭而才堪肆應知地方奸宄爲毒嚴捕訪緝四境救寧

趙頤字百期號樂窩江南青浦人乾隆丙寅以進士權邑篆折獄公平民無枉事邑義學久廢學田幾沒頤悉按籍稽復方倡修新塾旋改知分宜臨去捐俸屬新合成之邑乃有近聖書院之建

周瑋四川射洪人乾隆丙寅以舉人繼趙頤任訟獄置柳宅門令訟者自擊聽斷無留牘承趙頤志創建書院數十間榜曰近聖捐給脩膳延師選士造焉

王庭鈞江南丹徒人乾隆戊辰以舉人任知縣清慎明斷不稍瞻徇而矜卹細民卓有仁聲

華西植江南無錫人乾隆壬申以舉人任知縣勤勞民事調劑有方嘗累砂石狀元洲冀復舊義學未竟而去

金明達浙江山陰人乾隆二十一年任縣丞莅衆以寬每遇民訟必溫言化解嘗攝邑篆及新昌縣事均簡靜不擾有唐獨孤及治南豐之遺



李夢聰江南嘉定人乾隆辛巳以進士署知縣心念民隱  
日坐大堂蒞事剖決如神刀筆之徒莫能舞弄境內肅  
然

劉師亮貴州遵義人乾隆癸未以舉人任知縣吏事精能  
倡修文廟規畫井然尋調知南豐

門錡奉天正紅旗人進士乾隆丙戌任知縣明於吏治而  
心切愛人行鄉減騎從嚴戒胥役甫至盜竊風行飭團  
汎稽察嚴限捕緝果於賞罰半載而盜息

孫緒煌號楚隕湖北安陸人進士乾隆丙戌署知縣潔已  
矜民日用所需平買於市延接士紳恒汲汲如不及  
余賡颺號贊堂德興人舉人任教諭品行端方不趨時好  
訓士亦以立品爲先

凌西峯號申亭河南西華人乾隆甲午以舉人任知縣廉  
介嚴明居官服食淡若寒素有所詣勘肩輿從數人人  
莫知爲官也事必躬親聽訟嘗立判曲直吏胥幕友未  
由上下其手先是邑有疑獄不能決波累無辜西峯虛  
衷讞鞫得其受誣狀立釋之閭閻有以輕生魚肉人者  
西峯出令反坐其家俗爲之革治不尙煩瑣明約束寬



催科人咸戴之故訟簡盜稀而賦亦鮮逋尤愛惜士子名節公餘延見每勗以讀書敦品毋預外事縣試者三分校鄉闈者一人不敢干以私所識拔皆知名士在任數載職務具舉士民向化隣邑慕之上官廉其能凡獄有不得理者以委西峯而西峯卒以承審萬載獄去官西峯所鞠實無枉然西峯直則萬載令且望吏議萬載令有與援遂落西峯職邑人士恨之西峯獨處之怡然罷官後行厨蕭然無以自給士民爭以薪米蔬果相餉然卒不持一錢去之日攀轅號送者數十里不絕設位

於城隍廟祀之以西峯去官嘗僑居於是也時有詩歌一帙紀其事曰思棠集宜祀名宦祠

按西峰在官邑有青天之號鄉婦村童皆知其姓字舊志寥寥數語不見真面今以父老相傳事實摭摭成篇然亦不能什一也

朝廷表彰賢吏名宦有祠上高近代之官若公與王公樸允宜詳請入祀謹書於此以俟後之有志風教者

徐洪憲號梅臯龍南舉人任訓導學問淹博嚴於課督明倫堂圯率紳士捐貲修復左關帝祠右孝義祠并更新



焉新劉志

胡熙年字鶴田號蘭洲江蕪南匯貢生乾隆四十年任縣丞愛民重士培養人文邑文塔巍然則首捐之力也

范元颺號邁亭福建沙縣進士乾隆乙巳任知縣愛民禮士風政多暇每季課必躬親校閱以道德文章相獎勵又興立兩河義館倡修文塔種樹狀元洲以為培養人才之漸

李成芳漢軍鑲紅旗人嘉慶丙寅以庶吉士任知縣正月初六日抵上高清釐積弊不憚勤勞嚴飭關防罕通賓

客隨試童子於二月初校閱詩文累日夜不沾枕席榜出詳審清潔人方交口誦其賢乃未數日而暴亡矣邑人咸哀之

劉丙號克齋安徽廣德州進士嘉慶丙寅任知縣以作養人才為先每大比課士文藝必親點竄并作歌及文以獎勵之凡改建書院創立考棚纂修邑乘一切有關文教者無不捐廉為一邑倡戊辰五月山谿暴漲民幾為魚丙泣禱河伯欲以身殉賴從者曳之起乃解冠履投之水水立退庚午夏亢旱兼旬禾稼就枯丙為虔禱蒙



山甫回署甘雨如注歲獲大熟他如勸農課桑遷置躍  
錦橋埠種植狀元洲木興利除害善政不可勝書在任  
六年以卓異調浮梁陞寧都州知州宜祀名宦

人風表之

人物志

宦績 敦行

儒林 萬賢附

文苑

忠義

孝友

處士

嶽峻崧高實產名世傑固惟人靈亦以地筠右川原  
古稱秀麗宜有英髦篤鍾間氣家寶國華文章節義  
處則醇儒出則循吏紀績旂常誓功帶礪俯仰遺編  
前徽可繼作人物志

宦績

唐

鍾傳上高末山人以負販自業時王仙芝猖狂江南大亂  
衆推傳爲長乃鵬夷獠依山爲壁至萬人自稱高安鎮



撫使仙芝遣柳彥璋畧撫州不能守傳入據之言諸朝  
詔卽拜刺史中和二年逐江西觀察使高茂卿遂有洪  
州撫民危全諷聞傳之去竊州以叛使弟仔昌據信州  
僖宗擢傳江西團練使俄拜鎮南節度使檢校太保中  
書令爵潁川郡王又徙南平傳率兵圍撫州天火其城  
士民譴驚諸將請急攻之傳曰乘人之險不可乃祝曰  
全諷罪無害民者火卽止全諷聞謝罪聽命以女女傳  
子匡時傳以匡時爲袁州刺史擊馬殷又以彭玕爲吉  
州刺史玕健將也傳倚以爲重廣明後州縣不鄉貢惟

傳歲薦士行鄉飲酒禮率官屬臨觀資以裝齋故士不  
遠千里走傳府傳少射獵醉遇虎與鬪虎搏其肩而傳  
亦持虎不置會人至斬虎然後免旣貴悔之戒諸子曰  
士處世尙智謀勿效吾暴虎也乃畫搏虎狀以示子孫  
天祐三年卒匡時自立爲節度觀察留後次子匡範爲  
江州刺史新唐書本傳

按新唐書五代史俱以傳爲高安人陶志亦遂仍之  
不知南唐以前高安上高時析時併生其間者總以  
里居爲定攷傳生於末山麓梘頭在上高境內然其



時併望蔡爲高安未立上高縣史氏本唐載籍故以傳爲高安人至陶志爲一邑蒐葺文獻自當詳攷里居析傳爲上高人乃亦沿史舊文則其誤也若任濤家六溪其裔有毅夫清則羅肱家曲禮有三世孫之紀漆秀彥秀茂家敖嶺之西廬墓具在皆在上高境內故並析爲上高人因論鍾傳附誌於此

宋

羅肱字茂勤新城曲禮人自少豪邁不羣年甫十八金兵軼境肱集鄉兵保安數郡時大將岳飛韓世忠深倚信之而劉琦亦屢咨奇謀順昌之捷厥功居多特奏授秉義郎江西兵馬都鈐轄後憤飛死棄官屢召不仕

羅之紀字國張肱三世孫自幼穎悟淹貫經史嘗從朱晦庵張南軒遊揚誠齋謂其詩有騷體雷衛公謂其詩類東坡詞類淮海淳熙癸卯己酉兩領鄉薦開禧乙丑任本學教諭嘉定辛未奏名第一授廸功郎孝感尉時正言龔蓋卿持節湖北以之紀持身廉謹泄事精審薦諸朝攝雲蒙縣上官少不爲禮因雪壓竹賦詩云吾道非邪真可恥此君豈是折腰人又云心孔不容欺字入耳



根寧縱巧言干又云行行莫念家山遠明月滿船春水肥遂去官歸再調文林郎宜山縣丞未赴而卒號釣心居士著有易傳文集行世

明

况和卿河北岸人洪武間以人才應辟任寧波府同知為政嚴厲坐誣訴赴京廷訊不屈至抉目以示太祖驚異命醫之并賜絹以旌其直

况文字應奎河東人永樂甲申進士擢監察御史巡按浙江至湖州夜夢一人披髮從老翁來且泣且訴詰且有

巨蛇伏廳事乃召官吏詢之意必有冤者既而廉得歸安縣民嘗毒殺人匿屍山間捕鞠伏辜人咸稱為神明正統己巳都御史以扈從北行文望重一朝遂推掌都察院事尋出為廣東左叅政歷官每大書平恕二字以自儆故所在深得民心舊劉志

陳愚永樂十二年知長泰縣慈祥豈弟訟者以理解之使自消釋葺壞補遺不勞民力歷官三年治教修行時謂

得牧民之體

見福建通志各宦

王綱字存紀河東田北人永樂進士初會試登乙榜例授



教職與蕭時中等十八人奏考試不公文皇復親策稱  
旨並賜冠帶令祭酒司業親教之後辛卯科登上第任  
河南等道監察御史巡按福建廣西河南執法不撓所  
至有聲擢山西左叅政正統間以山西右布政使致仕  
歷仕四朝始終翼翼歸休於家不謁當事惟行鄉飲酒  
禮棹一小舟往來氣節凜然有古大臣風所著有薇垣  
清興集卒祀鄉賢祠見通志

李敬忠河北岸人永樂間歲貢長於占驗由上元縣主簿

游陞廣東四會知縣發奸摘伏人稱神明

見廣東通志  
各官

按廣東通志敬忠誤作敬中歲貢誤作吏員

羅九遜字順泰號恬翁崇本團洋田人任工部營繕所丞  
潔已愛民事上官不以諛悅爲恭宣德八年修理南京  
宮殿九遜粗衣淡食訓飭匠工一切營造銷筭雖極嚴  
寒盛暑不少休避先是工部有興作戶不問幾丁悉徵  
赴京役於公者十不一二餘皆爲所管人私役九遜廉  
得其實方請革其弊於國計民生殊有裨益上官多倚  
重之正統二年加營繕所正銜尋以母老告養歸里建  
有勅書樓迎恩橋以誌感



黃景字文昭修仁團人成化己丑進士歷禮部主事郎中  
奏對稱旨陞左通政尋遷禮部左侍郎宏治初以時議  
不合致仕正德間忤逆瑾謫戍燉煌瑾誅乃得赦歸卒  
景嘗奉詔保定河間賑荒計慮周悉全活甚衆又嘗勸  
憲宗以養心之學及建議裁抑西僧之爲民害者持論  
侃侃綽有足觀云

晏鑣字雅聖全安下壩頭人天順壬午舉於鄉謁選得湖  
廣寧鄉縣知縣人以長材短馭惜之鑣曰是豈不足報  
國恩杼夙抱耶單車抵任因其俗爲設禁教養民愛士

有龔黃遺規邑大瀉飛鳳諸山素稱賊藪鑣設方畧撫  
勦並用群盜解散吏民安堵尋丁內艱人賫百錢以送  
號泣而去服闋補四川大足縣仁愛廉明視前有加以  
赴召人都卒於途嘉靖間祀鄉賢及寧鄉名宦祠

按鑣旣祀鄉賢不應缺傳今采家傳以補劉志之闕  
吳鏗字廷器河北岸人歲貢生成化時授泉州府推官性  
喜淡薄節嗜慾嚴取與嘗自勵曰居官不清白何顏覩  
士大夫後解組歸行李蕭然了無不豫之色林居二十  
年家計屢空晏如也士論高之卒祀鄉賢



簡芳字德馨修仁園人自幼穎敏宏治丙辰進士初任南  
京刑部主事歷員外陞兵部武選司郎中性耿介執法  
明允權勢無所假借卒於官祀鄉賢祠

李文字顯道由舉人知乳源縣介潔自持興學校崇禮教  
政化大行比卒士民流涕

見通志

聶琪字周贄豸上人正德辛未進士觀政刑部平反不阿  
權勢雖被降謫操行彌堅尋擢福建僉事會倭寇興泉  
粵冒矢石民賴保安以山東兵備副使致仕親睦隣族  
不吝施予常榔然自下人不知爲顯宦也卒祀鄉賢

黃美號石龍河西灣溪人選貢生性剛介嘗讀書白鹿洞  
厯知嘉興秀水縣所在稱治故事坐堂日供黃絹一匹  
美曰民脂膏也去之有吳生鵬才而貧美厚遇之及美  
致政歸不十年而鵬開府江西會有令營薦者知美最  
善鵬持數千金以請美愕然曰求薦豈好官耶麾去不  
顧江南巡撫慕其高節具金綺聘之不赴乃寄以詩有  
不羨金龜好偏乘白鹿遊之句卒祀鄉賢祠

李偕號少峯河北岸人嘉靖庚子舉人授大田知縣方下  
車逋盜爲亂嚴治塹堡以威鎮之厯任三載俸資外分



毫無取陞太僕寺丞去日民携金帛爲贈和顏慰辭之  
尋授兵部主事調工部督建永定七門重城累功賜金  
出爲廣東兵備道克平寇攘具疏定二源奉旨以邊才  
超擢議陞開府尋卒建有章賜堂寶勅樓留餘書院著  
有李氏家藏二十四集併諸疏稿

吳學詩字伯興號虛宇河北岸人事母以孝聞少穎敏篤  
學經史過目成誦督學王宗沐巡撫何遷竒其文稱爲  
大家登嘉靖乙丑進士授庶吉士轉御史出爲四川兵  
備道遷尙寶卿終山西按察司副使歷仕三朝所在令

聞昭著嘗家居遇旱作祈雨文柳冠縞衣率士民禱於  
城隍三日甘霖如注僉以爲誠敬所感著有復初堂集  
王京字來觀河東團田北人隆慶戊辰進士授同安知縣  
同安濱海京諳練機宜倭寇不敢南犯尤加意造士民  
有內順外威之歌且立有作人德政二碑佐治衡陽復  
以循聲擢守徽郡京知其俗姦黠下車卽以禮讓默化  
士民允服竟以絕交權要致政歸著有輝映集

潘仕紳字以書河南岸人隆慶間貢性恬介安貧砥節有  
古修士風初授五河縣知縣招撫流移剖劉大海等冤



獄衆稱神明邑洊饑捐賑三載公私兩竭仕紳虔禱於城隍忽河內產山芋無筭軍民賴以存活貧民鬻子者贖還之擢羅定州知州猺獠獷悍殲其渠魁餘孽歛跡讞反側疑獄二囚編氓安堵復著善後圖說由是馴爲化疆尋遷廣州府同知堊溺尸修戰艦節費蘇商皆政之可紀者陞兵部職方司郎中未任卒祀名宦

李正華字懋實號梅麓生而穎慧試輒冠軍萬曆己卯舉於鄉選山東滕縣教諭課士有方學使李林寰拔其文爲東士式擢南皮知縣縣於河間爲僻壤正華撫字十

年善政難以枚舉其最大者革除門役講求救荒實政民享其利至發豪窩越奏之奸燭少年竊女之詐尤爲上官所獎方將行取而鹽山復請借寇遂以汝寧通判帶攝鹽山縣事正華治鹽亦如治皮兩邑皆立祠祀之致仕居鄉足不入城惟以嘉獎後學爲志學者宗之稱爲文沙先生著有續自警編一卷林下盟二卷易疏鈔一卷文昌史一卷

聶應科字廷傑號惕吾珙之孫萬曆癸未進士初任福建漳州府推官士民德之爲著漳南紀續集及德政去思



二碑已丑行取南直河南道監察御史上疏萬餘言其目如養聖心平喜怒定國本回天變阻東封罷西討除貂璫飭漕規肅上下之江防刷屯馬之積弊皆切時務又如嚴窩訪禁仇扳糾貪險劾曠耗諸條皆侃侃直陳不避權貴由是名列御屏殆將重任後以親老告歸侍養庭闈課督孫子捐貲修葺學宮作記重新文閣為一邑培養計者蓋其備焉中間吏部特疏起用同鄒元標顧憲成推錄不起復同馮從吾李宗延等十三人起北京御史仍不出曰母年九十黃麻不如綵衣也既丁內

艱顧院猶有吳道南陳維春聶應科三臣雖讀禮未終推轂宜先之奏守憲王某贈言有曰抗疏輸丹兩袖芒寒星斗翰光養重一簾清澈水壺天挺高才人推名世真知言哉據舊劉志改撰

黃居德號惕齋河西人倜儻非常以卓異薦舉入京吏部考居天下第一歷知靈山清河有聲擢邳州兼攝高郵有治河績方晉秩念父年九十請歸養弗許居德曰豈可以官而忘親也拂衣去河督潘季馴扁三知堂以贈其行蓋謂知忠知孝知止云卒祀鄉賢祠通志



曹汝蘭字斯馨南里團馬湖人萬曆丁未進士知四川江津縣以廉能稱行取南臺御史天啟初首進保護聖躬疏疏入報聞又條議時弊若干舉刺並持大體不激不同得進言法至加惠桑梓如建義社倉津北糧解合邑賴之卒於官祀鄉賢祠所著有日知傳習錄詩集併南臺奏議稿見通志

潘惟一字思本萬曆選貢授淮安府清河縣知縣天性謹厚行誼高潔嘗謂人生不可忤俗然亦不可混俗居官兩載惟以愛民爲心興利除弊法在必行致仕家居三

十年雖囊篋蕭然處之晏如每以孝弟忠信勸諭族里閭黨化之年九十二卒舊劉志

黃啟生字嘉遯號衡門鑑之子性孝友好獎誘後進於書無所不讀以選貢知四川保縣攜兩蒼頭之任懷撫百姓以威信結諸酋長終啟生任羗人不敢譁保學舊寄茂州啟生詳請得自建學親加教誨士益知自勵任滿調繁西充保人立祠祀之西充當孔道啟生素羸力疾視事憊甚卒於官囊無一錢士民感泣請於上官貲助歸其柩著有清嘯亭薄遊草及舟中和韻諸詩舊劉志



王文建字子建河東田北人萬曆戊午舉人初任山東冠縣教諭倡明理學學使湯道衡雅重之齊魯之士多宗焉陞濟陽知縣時畿輔數被兵濟陽爲山東劇邑多盜文建撫禦有方威惠並著城賴以全上官以邊才薦者凡十三疏陞南京東城兵馬司指揮因疾致仕後屢徵不起老於家舊劉志

况鏐字于玉號湛如河西城圍人天啟壬戌選貢初授廣東雷州府經歷擢山西太原府崞縣知縣崞邊邑也朝廷歲遣璫巡視沿邊墻垣堡墩所過盛供帳鏐獨無加

禮璫怒嗾當道逐去知鏐廉能重違璫意降調嚴州府照磨時翰林項煜亦降嚴州經歷相與爲文字知好著有唱和坎坷二集尋遷山東萊州府推官甲申罷歸鏐爲人慷慨任俠嘗捐金重建祖祠邑貢士黃鼎樊盧瑜陳其謨赴闕上併呈疏鏐助之費所著二酉齋集方逢年孫傳廷易道沛序皆比之邵堯夫年八十卒

黃日新號南蒙河西灣溪人由吏員授淮安府沐陽縣縣尉沐故濱淮海飛輓轉運緝捕不易日新勤於職中丞潘廉其能委督漕河工日新芟草班荆與河卒同甘苦



防汎考上上調清河再調桃源致仕歸建南蒙書院課  
子孫累代表衣冠不替舊劉志

况上聞字德升號景窩河北岸人由貢生任四川石碓司  
經歷石碓女士司秦良玉方有功朝廷兵卒強悍緩戢  
爲難上聞孤身至其地卒有以服良玉心而下攝羣卒  
賢能之譽達於兩臺後良玉奉詔平寇上聞以監軍調  
度軍務盡協機宜凱旋陞寧川叅軍黃志稿

### 國朝

黃鼎葵字象先號毗城河西灣溪人性孝友剛方負經濟

大畧爲諸生三十年屢試不遇慨然曰大丈夫不能計

安天下要當造福桑梓耳於是條陳邑之縣總區團總  
諸累民者一切汰除之邑漕米視他邑米一票溢三籌  
復控上減之年六十以明經入對疏乞併里省費已得  
俞旨值明多故不果行瑞州舊有僞漢時浮糧明沿爲  
額征三邑困甚順治二年江西歸附鼎葵首倡三邑紳  
耆呈請奏減九年覲臣據以入告瑞州遂獲減浮糧九  
萬九千六百有奇三百年重困一朝以甦當明季大并  
窩寇猖獗鼎葵上守禦事宜于台令不聽致上高殘破



其後官兵再勦竭寇就平然發踪指示鼎彝策若多

國初舉廉能攝袁州推官時袁新定城虛無人鼎彝揭榜

四門招集歸舍十日舍幾滿各拊循之使復其業尋加

監紀督兵平曹國祺之亂調度有方五營咸遵約束不

妄戮一人事平叙功擢用竟不赴家居三十餘年惟以

理學經濟忠孝大義引誘後進所著有雪浪齋詩稿閩

遊草粵遊草石田茅屋雜著易經四書金針三大事始

末等集年百歲卒從祀鄉賢祠

江廷魁字薇臣崇本團山棗渡人順治丙戌舉人乙未明

通榜進士知正定府藁城縣居官廉而有為庭無留訟

獄無繫囚吏民懷之時藁城學宮頽圯下車即捐俸新

之藁多荒蕪重為民困設策召墾甫一年田土盡闢撫

按交疏以卓異特薦復以緝解逃人功題叙行取擢陞

廣東連平州知州藁邑立有去思碑居鄉值歲凶倡義

張濟戊子金玉犯順大將軍整兵恢復廷魁身冒鋒鏑

率眾投誠鄉城始獲安堵又以前明浮賦貽害與黃鼎

燹等呈請奏減邑人至今德之

聶煒號怡園豸溪人侍御琪裔孫邑汰浮糧嘗三訴上臺



有功桑梓順治間以拔貢歷官山東滋陽廣東南雄所至有聲擢補江南徽州府清軍捕盜同知下車嚴保甲法姦宄屏跡清釐屯田悉復舊額困丁以避一時有生佛之號尋攝守篆捐俸以修學宮及損火耗助解費刑清訟簡將膺優擢以他累左遷廣州府通判

任際虞字唐臣號日峯河西六口人幼穎敏絕倫爲諸生恣意爲文落紙數千言立就塾師異之一夕限成七藝鷄未鳴而脫藁康熙甲午中江西鄉試第一戊戌成進士改翰林院庶吉士散館授檢討充

省方盛典館纂修官雍正元年克順天鄉試同考官二年甲辰春補行癸卯

恩科鄉試克雲南正考官獲

賜貂皆

特恩也抵滇後入闈與御史江芑率同考官矢公矢慎取

鄂宣等五十六人皆一時名下士滇中稱爲數十年鄉榜之最旣而復克一統志館纂修官丁未卒於京師年六十一際虞性廉慎以儒術起家筮仕十餘年登掌文衡皆能不負委任卒之日不能治喪具咸以未竟所用



惜之子文瀾雍正丙午舉人孫德明乾隆戊申舉人

晏命世字覺先號九庵仁里團鍾家渡人為人渾渾噩噩

純與天遊學問精深作文援筆立就樸茂風華不名一

格雍正癸卯成進士後高安朱相國延為子姪師暇輒

與講論不倦選授貴州邱江縣知縣興利除弊一本經

術日與紳士以道德文章相勸勉課諸生常攝藝為程

式士論咸推服之卒後遺稿散逸王已山谷選其文遺

人求之不得深為惋惜

黃光岳字聚生號碩廬鼎彝曾孫作文日得數十藝鄉會

試皆以五經獲雋除授浙江寧海知縣蒞任六載行順

庄除里役詳革竈課賠丁虛糧鹽羨諸綱弊甚得民心

繼丁內艱制府李衛廉其能奏請留督海塘要工服闋

攝篆蘭谿旋補金華蘭故有額外浮耗光岳悉免之弁

請緩歷年帶徵聞鄰郡水蝗相繼令有穀之家減價通

糶好義者響應蘭民作頌庚吟來暮歌以志其德先是

金華有盜劫賈於途者誤繫平民既誣服光岳按獄得

其情請平反於制府本衛再申再駁懷贖自陳會他邑

獲真盜以聞獄始解衛益重之尋卒於官櫬歸金民哭



重修高縣志 卷七  
送者百里不絕著有宦越草粵遊草隨意草等集弁輯  
吳太史黃西和李山人三詩合編行於世

黃克顯字去非號敬亭光岳之子由拔貢生考取宗學教  
習期滿揀發四川歷署墊江綦江縣事籌運糧餉著有  
勤績題補岳池知縣興塘堰瘞遺骸建義學教民蠶桑  
集紳士纂緝邑志補岳池數百載典章之闕乾隆二十  
二年夔州府雲安厥鹽務同知移駐石碛廳石碛故土  
司地綏靖不易克顯適攝其事力行保甲清編煙戶釐  
正糧則嚴除奸蠹加築水堤新建廟宇工費甚鉅皆不

以累間闡大計以卓異薦擢署叙永廳同知明年復署  
打箭爐同知外與西藏爲鄰克顯久任邊疆威惠兼施  
番民安其治絕無爭訟內遷刑部主事監督戶部海運  
倉涪陞員外轉工部郎中皆稱職初上高新昌合建會  
館於京師日久頽廢幾失所在克顯內官十年清查基  
址積俸餘獨力修復兩邑公車旅宦咸嘉賴之後年老  
予告手編上高縣志藏於家

江學訓字慕尹號任齋崇本團山棗渡人乾隆壬戌進士  
任河南桐栢知縣慈祥愷惻教養有方值年饑民爭食



加意撫戢不逮繫一人或以爲慮學訓慨然曰官可罷民不可虐也後乃以此改任饒州府學教授士民感其德至今傳述不衰

廖廷佐字遐有號樸存河南團人雍正壬子舉人乾隆乙丑明通榜進士選授宜黃教諭截取知縣揀補天津倉大使改授四川蓬溪鹽大使少負異才於書無所不讀事繼母以孝聞居鄉剛介人師仰之教諭宜黃訓課殷勤規條詳備宜士方之安定先生迨理鹽政悉心規畫嘗誦程子一命之吏苟存心於愛物於人必有所濟語

慨然以利濟爲懷官秩之崇卑勿計也致告歸年八十四卒子天秀邑庠生天錫國學生

羅學泗字有源號杏亭崇本團洋田人少爲邑諸生試輒超等教授生徒袁筠二郡間藉藉有聲乾隆甲戌以歲貢任崇義縣訓導或以才餘於用惜之學泗怡然曰教官吾素志也事君以身曷若事君以人吾多育才爲國家用顧不可耶持身端慤課士先德行後文藝文以清真雅正爲宗一切險澁詭僻浮華臃腫不中度者並斥之多士翕然向風著有學庸管窺二卷初學論文四十



則年七十有一卒於任崇人士私謚之曰持謹先生  
任文溥字滙中號約齋河西六口人乾隆癸酉拔貢補建  
昌教諭俸滿保陞知縣歷任福建仙遊陝西安定沔縣  
三原縣卓有賢名擢商州直隸知州吏事精明所屬安  
堵上官屢委清釐積案細大勘鞫盡得其情年老告歸  
卒於家

黃祚昌字永錫號貽堂河西灣溪人乾隆乙酉舉人初授  
浮梁縣教諭截取揀發廣東歷署會同縣知縣萬州知  
州補興寧縣知縣祚昌廉介恬靜惟以讀書爲樂不慕

榮利其在浮梁訓諸生以忠孝大義課文親爲點竄崇  
實黜浮士風蒸蒸日上官會同時士民愛之如父母去  
之日叩大府乞留者數千人興寧爲粵東殷富邑祚昌  
廉潔自持一無所取有勸以植產遺子孫者答曰積金  
帛以遺子孫不如留清白以遺子孫廉吏不可爲而可  
爲古人之言宜佩服也蒞興三載疾篤告歸兩袖清風  
依然寒素

黃士續字繼先號月峯光岳孫乾隆間以拔貢任江蘇崇  
明吳江震澤鎮洋縣丞俸滿以知縣用擢署寶山鎮洋



縣事蘇故稱繁劇監賑解餉濬河牒下旁午士續急病  
 讓夷上官資為左右臂然務持大體民以瑣屑訟者輒  
 斥去不為理嘗語人曰利民實難擾民則易此等虛詞  
 聽之徒擾民耳甲寅嘉定寶山游飢無食者聚而噪姦  
 民煽之令倉卒走省垣士續時為鎮洋丞巡撫都御史  
 檄就近偵之即馳諭其徒曰若急解散歸農行且張若  
 民稍解散因以便宜繫其魁至省則已議調兵會捕矣  
 士續進謁具言寶民安堵不足用兵狀乃止坐其魁全  
 活甚眾嘉慶壬戌海寇蔡逆入犯寶山洋親督壯勇禦  
 之礮斃賊酋一人迨鎮標兵至賊已宵遁宦蘇二十餘  
 年不名一錢卒於官護撫胡克家為歸其喪子寶麟歲  
 貢生宮麟邑廩生

晏善澄字準吾號薇東辛義中堆峯人幼秉異姿博通經  
 史為今古文如萬斛源泉不擇地湧出人比之韓潮蘇  
 海詩則抒寫性情別裁偽體書畫亦皆精絕乾隆辛卯  
 舉於鄉戊戌成進士知崇陽縣築堤堰民享其利刑書  
 院躬親校閱文風為之丕振調任孝感縣西有湖濱平  
 野每清明節士女踏青於此百戲具陳游觀累日善澄



惡其無別作後湖曲以示諷其風遂革又其時襄陽匪警軍務旁興善澄兼攝丞篆撫綏守禦克著勤勞大吏將以郡丞薦諸朝尋以病告所著有歸田學易感秋詞述園文稿詩稿待梓子三人棲邑廩生棠嘉慶辛酉舉人棣例授州同

黃墉字勤園號輔齋克顯子由廩貢肄業國子監選授南昌府儒學訓導教士有方性醇謹平易中而風規甚峻不爲勢利所動學使者某嘗三示之以私墉若爲不解使者忌之陰欲奪其官因士心愛戴憚而止某生素無劣行以拂縣學師故徑詳褫之墉爲力白其冤事乃寢在任二十餘年以俸滿陞贛縣教諭未赴任養病旋里年八十餘卒

潘有本字宿來號萬亭唐良樓下人乾隆丁酉舉於鄉屢試不第嘉慶六年大挑一等分發安徽以知縣用委署東流數月政簡刑清士民歡洽大吏方器重其才而有本力請改教選授奉新縣訓導其學以正誼爲主與人真誠樂易外雖不設防畛而內行彌介其論文以經義爲根柢而以理法繩尺其間官奉新二十年浮薄之士



不敢至其門故士習益醇文風益振年踰七十具文乞  
休歸舟已纜於城之西南邑諸生再三懇請復畱數年  
至七十有七始歸里諸生戀慕不捨請涂公日耀作文  
送之歸田後精力已衰然猶訂修族譜斟酌盡善最其  
生平可云完人矣

喻正元寧太官橋人生有膂力智畧出羣少游四川嘉慶  
二年順慶府大竹縣邪匪滋事正元團聚鄉勇設卡堵  
禦以勦賊功拔補外委撥守巴州等處洊陞千總奮欲  
以功名自見未幾遽卒人悼惜之

儒林

宋

羅善同字信遠新城曲禮人自少勤詩書友善類程明道  
嘗遺書云人之所以爲君子在不失其本心要常自默  
奉會必勿使一毫私意間之斯可到聖賢地位自號純古  
先生將謝客有詩云風急漢雲歸碧洞月高涼露返蒼  
巖乾坤萬里明如鏡輕輦遙遙倩鶴驂著有詩集藏於  
家府志

明



况暹字鼎元河北人永樂丁酉舉人歷任萊陽漢川歸安  
教諭以子璉貴封儒林郎光祿寺署正制行純潔文章  
典雅周旋禮度俱可爲法家居三十年以讀書作文自  
娛卒祀鄉賢祠通志

李應時號南川河東瑤坊人以子衿從安福鄒東廓先生  
講學東廓歿後江西之宗姚江者咸推李南川萬厯間  
天下尙文會江西理學亦然歲在子午卯酉則畢會講  
宋學主其事者皆名宿南川歿後會時必問南川後人近  
况同時顯官吳學詩王京李偕皆與交遊或就其家或

迎至各祠堂設高座率子弟北面受業焉子名彥芳舊

劉志

國朝

喻本義字宜也號盱齋寧泰官橋人歲貢生幼端凝寡言  
笑書過目不忘七歲就里塾塾師驚曰此非吾所能課  
令別尋師家貧乏書籍見同學誦某經索共讀不得至  
嗚咽父亦悵然急賣腴田二畝爲之購書應科舉屢薦  
不售既貢成均猶逐隊子弟止之曰應舉何必售不售  
亦何必不應識者皆嘆賞其言性好靜終年住僧舍絕



口不談禪宗衣冠整肅對羣兒如接賓客教育生徒數十年贊喆多出其門而高安朱文端公尤專師之嘗勗文端公以主敬存誠之學曰子器識純粹當負荷聖道後文端公表其墓猶追憶面命耳提而嘆先生之學識為不可及云

探墓表

文苑

唐

易重字鼎臣千春北鄉欽仁團人會昌中張蠙榜進士第一二會有詔覆試黜蠙以重代之官至大理評事著文千篇子燾仕南唐為雒州刺史

按易重為易延慶之祖贊為延慶之父宋史易延慶傳父贊歸朝授道州刺史延慶以父蔭奉禮郎授大名府兵曹參軍是也延慶為上高人林志云以祖重宦游於此遂家焉然縣西南千春北鄉有舉子岡以



重登第得名則重非宦游於此實微時先家於此者故重之為上高人無疑也舊志以入人物志不為無據

任濤河西團六口人性慧超羣詩名早著時常侍李隲觀察江西見其詩有露團沙鶴起人卧釣船流之句特免其役鄉民有援例訟之者隲判曰境內有詩似濤者並與免役無敢應者咸通中登進士通志

宋

李崇義仁里團長陵下人生而神姿穎邁讀書目數行下

七歲即遍通諸經而詩書尤精熟嘉熙戊戌舉童子科應試者七人崇義擢居第一邑令江湘作五古一章贈之

明

黃鐵字文叔河西團灣溪人隆慶庚午舉於鄉初授瀘溪教諭萬曆戊子克四川同考官選授河南夏邑令因病予告家居二年復起為荆門州學正委署當陽縣事尋補陝西西和令致政歸資聰慧博學好古生平恬淡無求惟以詩文娛志與人言論不激不隨所著詩集九種



經兵燹僅存殘編族來孫光岳梓以行世蒲圻田正於序謂文叔黃君十四舉明經不色喜春官五下第無戚容其生平梗概可見年九十卒

李堅號雙江下京陂石虬渡人工詩善畫意氣磊落不羣與邑之吳虛宇李少峯新昌之蔡青門鄔東泉交最契豫章諸王孫如少元瀑泉嗣源輩時稱爲漢之更生子駿者聞雙江名爭欲結納之值雙江族人修譜少元親書盤根仙李四字弁譜首并以南州高士額贈之堅吟咏甚多以家貧未梓流傳絕少雍正間邑人黃光岳到處徵求僅得五七言律若干首餘體悉無而古木當窻作人語爲古今所艷稱者今求其全篇亦不可得爲惋惜者久之

易時敏忠義上團人博學工詩推重當時嘗與修邑志與都人士往復賡和膾炙人口著有蟠溪集

黃啟美號懷雅河西灣溪人西和令鑑之姪也少從李雙江學詩師弟之誼甚篤執贄雙江門下者遍於遠邇獨啟美得其閩奧稱高弟焉著有招隱堂求教編紀事諸作綽有杜陵之遺律詩流傳亦與雙江畧似黃稿



曹之榘字炳南馬湖人邑增生賦性莊謹事繼母以孝聞  
髫年博覽羣書試輒高等郡守魯史邑宰徐士華前後  
首拔有丹成九轉符看鵬飛之譽後數奇不遇以教授  
生徒爲業鈴陽俊彥出其造就者尤多所著有課兒易  
解先後繁約二集

鄭湯臣字任吾河北岸人九歲能文博洽經史三應童子  
試不售嘆曰文章須自成機杼安可共人作生活也遂  
築室東郊工詩畫好琴棋嗜古法帖敦行孝友屏跡不  
過隣里自號遜齋嘗爲詩論云明興以詩名家者當以

李空同何大復爲首然二人互相譏評何自以爲神思  
飄逸自成一家李則謂其杜撰李自以爲音格悠揚迥  
得宗旨何則謂其沿襲竟不相下以予質諸所聞李似  
得之矣又爲學書畧云字無百日之功言非百日可成  
久自有得昔張芝臨池學書鍾相學書抱犢山十年趙  
子昂不下樓者數年夔山子每政暇習字唐太宗學蘭  
亭記馬上不忘近文衡山年八十餘尙濡墨無虛日皆  
備極精妙湯臣持論如此其風采亦可想云舊劉志  
李調元字鼎伯性孝友力學精苦自童年至卒勤勵垂三



十載布衣蔬食誨人不倦崇禎壬午主司稱其器格端  
凝異日必為國士年四十一遽卒士論惜之著有卜氏  
詩解并陶詩擬陶詩合集等註藏於家黃稿

國朝

李光祚字瑤生河北岸人邑廩生僉事偕之後文卓然自  
成一家士咸宗之

李凌漢字天章號末雲上京陂東邊人年十八始就學歲  
餘即知屬文順治甲午由廩生登賢書奮欲以功名自  
見公車屢上而卒莫售讀沈攸之早知窮達有命悔不

十年讀書語乃益博極羣書專心著述康熙丙辰選授  
河南孟津知縣辭不就築似園於京溪之旁引水為湖  
因山架閣亭臺花竹錯落其間門聯有云欲問山中人  
柴門向水不聽窗外事竹徑封雲其意致概可想已凌  
漢於吟嘯之暇將歷代正史雜史及諸家文集說部并  
道藏釋典分類編排勒成似園閒編十種書凡數十冊  
晚年為疏募刻不果後子孫家落半燬於火半為人持  
去惟十種總叙各叙及北遊草吳越草付之開雕者今  
尚存據舊志增撰



喻元字我捷正全安屏溪人順治丙戌副榜常以科第自許竭力經史夜不設蓆為士林中巨擘

胡維亨字元臣號泗齋忠城人為人馴謹自持立身制行具有本末性聰穎年十三補郡學弟子員文思奧衍雅近章羅詩淡雅宗陶靖節試輒高等康熙丁丑恩貢選授清江縣學教諭因疾篤未赴任著有泗齋詩文合稿

見陳守創撰傳

羅瑞圖河西團南源人任內翰際虞受業師也天才超邁文亦疎宕有奇氣遇觀風考試師若弟輒迭冠其曹每

試牘流布讀之者靡不擊節爭延為子弟師一時譽髦多所成就應科舉屢得復失康熙甲午鄉闈主試已定任際虞擬魁瑞圖一經副主試力爭不可日如此佳文不得元無寧不中畱為下科作第一人也然瑞圖竟高於遇後當以次貢成均亦不就士論惜之

潘述祖字紹衣號諡齋河南岸荆湖人康熙癸巳進士改翰林院庶吉士乙未散館試卷越幅抑置二等

祖仁皇帝拔列一等授檢討供奉南書房忽得疾卒時論惜之性沉粹不輕言笑資稷聰穎而為學甚勤嘗讀書

聖

重修上高縣志 卷七 人物 文苑



真祐觀夏月抱一編於神座前神專氣寂蚊集其背不覺也自幼爲大父所鍾愛父喜任俠不事生產母嚴知書督課甚勤述祖自外傳歸必令覆誦十歲母卒哀毀如成人事繼母至孝撫繼母弟述德友愛殊常述德卒祖時爲舉人不願與計偕父促上公車乃成進士卒年四十九所著諡齋詩稿格意高雅如其爲人

傅崧字松山號仁峯河西團高湖人父宗佐破產延師與任日峯晏九菴諸人相砥礪諸儕輩皆俯首推服歲科兩試名次不出三人而棘闈屢困雍正癸卯始以選拔

貢成均爲人磊落負大志不與俗伍凡事關綱常名教必身任無所諉郡庠袁生與崧稱莫逆未舉子女卽與訂婚而袁生天藐孤煢煢或有疑寒盟者崧曰吾可欺死友哉卒以女娶之飲食教誨同骨肉學師王與署縣柯杆柯借事中王黨與甚衆崧挺身作對王得理而柯被參上高兵折耗費頗繁崧以折耗并納呈請一縣食利晚年縣令周璋延掌義學士爭欲出其門令有故輒詣崧相商而崧終不至縣卽開攜文手相考訂亦絕口不言他事令甚重之贈以序稱其文單微之思入紙許



深飄逸之氣離紙許遠詩歌沉鬱豪放不一其致蓋實錄云

盧從志字二期河北岸人思恩知府瑜之孫也弱冠卽工文章言語妙天下與進士黃光岳交最善爲人磊落負俠氣雍正戊申邑大旱禾盡枯邑令劉欲報災有尼之者從志慷慨助之事始濟家貧遇坎坷手一卷晏如也嘗擬向粵西省思恩公墓留楚寓彭家村舍弔三閭大夫有詩云消磨志氣減丰姿一路牢騷賦楚詞自信前修猶可法彭咸正則總吾師其志亦可哀已著有自娛堂六草高安朱文端公知縣事竟陵周璋白沙黃光岳序而梓之今傳於世

晏光華唐良團天嶺人博雅能文尤邃於經與其弟士美先後食餼互相砥礪一時有二晏之日旣士美舉於鄉光華益篤於學著慕蕪堂文集爲世宗仰子世錦亦邑廩生讀書作人皆有父風當牟廷典宰邑時棚戶混土著就試羣莫之稽世錦鳴於當事直之至今棚戶不與試其所倡也

新劉志

潘有璜字起渭號釣溪唐良樓下人簡默沉靜腹笥富有



屈抑諸生中四十餘年嘗語同志曰吾輩讀書原期有用雖古大儒如朱紫陽未嘗輕貢舉也但尋章摘句揣摩風尚究無裨實用耳白首蒙

恩賜翰林院檢討咸以爲窮經之報云年八十有三卒子大化邑庠生

熊炳字虎文號潛菴後塘團山陂人歲貢生少受業分宜林平園先生學有原本爲文簡練有法而風神仍復盎然屢薦不售以授徒終性故和藹一蒞館中則凜不可犯衡文洞中窺要雖極叢冗之章一經點竄卽具有條

理門下士列膠庠取科第者遍遠邇事親孝父病目眚炳朝夕以舌舐之復明如故尤勇於爲義歲得館穀甚豐皆緣手散諸兄弟以濟匱乏嘗解館歸途遇鬻妻償債者炳傾囊周之不少吝甲子乙丑間上高重修文廟人出百金助費炳家故貧無擬之助者而炳慨然曰吾食先聖德數十年敢飲水而忘源乎稱貸以應皆以爲不可及據墓誌銘

黃耀英字明遠號桂軒修仁團澤山人性溫厚不露圭角讀書之外無他嗜好乾隆戊申科主司趙佑亟賞其卷



重刊一書果云  
稱爲一片空明是大解脫是大智慧擬魁一經以違踰  
字限抑置副榜首深爲惋惜歷署樂安永豐德化萍鄉  
永新等縣教諭所至有聲

黃寶麟字誌摩河西灣溪人少穎異有神童之目長益強  
記每鎖院題紙下環集問經義應之如響屢薦不售以  
歲貢終寶麟渾厚精明能和衆以集事嘉慶己未庚申  
間學宮頽圯特甚寶麟倡議撤而新之敦勸邑殷實人  
輸百金佐役先是邑有興作董役者頗不謹於出納邑  
之人久弗善也聞寶麟議乃譁謂土木之興大都選事

而忌寶麟者復撓之以此莫有應者寶麟推誠引諭獨  
襆被卧敗廡者彌月人感其勤爭先慕義旬日間攜貲  
踰萬以上始得卜日興工規模圖度詳學校志遂以餘  
貲修郡城考棚並置產善後始終四年同事皆刻勵振  
刷會計出入勒爲成書邑無閒言後起賓興會以資試  
費寶麟之力爲多其學有體有用賈志而沒未竟其才  
學者惜之

黃毓光字東來一字曙亭唐良模坑人弱冠補弟子員卽  
有聲每試必居高等註第一者數次戊辰與曹星平李



祖陶同舉於鄉性恬淡文如其人論者有天半朱霞雲  
中白鶴之目尤工詩五言如青燈荒塾暮紅杏曲江春  
七言如境似桃源紅滿地人依蕉圃綠爲天並爲藝林  
傳誦嘉慶丁丑大挑一等分發湖南以知縣用戊寅遠  
卒年四十八時論惜之

忠義

元

任毅夫字士宗河西六溪人學直清則父也延祐間嘗命  
清則捐俸修文廟造祭器仍以家貲繼其不足乙卯夏  
澇水高數丈居民升屋蔽以雨蓋不舉火者數日毅夫  
具飯餽舟食之賴全活者甚衆水退米價騰貴作饘粥  
食饑者日千人或有持金來買穀媒利者毅夫曰吾非  
不愛汝金留此續鄉人食耳與子清則俱崇祀孝義祠  
舊劉志



李祥卿德義上瀚堂人輕財好義禮賢愛士至順壬申年  
捐已田八十餘畝地二墩庄屋五楹歸學以供生儒廩  
餼祀孝義祠

沈元輔河北岸人祖以南漢陽府判父普知淮安寧海州  
世有政聲元輔年二十二任高安將仕郎至正壬辰僞  
將歐祥攻袁州帥兵赴援扼賊於秀江橋力詘戰死宜  
祀忠義采梁寅塗節婦傳

按二劉志均未爲元輔立傳今因校讐梁寅塗節婦  
傳亟爲補入惟元輔妻塗氏雖列節孝而小傳稱元  
輔兵亂被殺與梁傳不合又元輔三世仕元攷之選  
舉文職俱遺漏未載今悉爲補正

明

李仲德河東邱塘人洪武丁卯以人才應辟任龍江提舉  
上言民情未幾攝河南道事清儉執法時以鐵面目之  
陞大理評事改刑部歷四川河南司主事恒捐俸餘以  
濟公用同僚高志明等忌之誣以事仲德廷爭不屈觸  
上怒被誅旣察其寃特旨賜祀戮誣者以狗  
按郡志載正統景泰間輸穀千石得立牌坊旌義者



上高有戴克讓吳旭明冷瑛毛萬方等四人今考戴克讓河北宣化坊人吳旭明白土上泉港人冷瑛景行人毛萬方景行千子岡人附記於此俾不泯沒云黃鑣字大冲河西灣溪人居德子邑增生濶達大度少時隨任邳州歸赴鄉試路出下邳驛目擊荒旱傾囊數百金濟活饑民無筭居家孝友撫從弟孤兒婚教過已子抱弟應繼伯父弟以父產稍厚不無難色鑣均分之且令縱取焉年八十而卒

曹志明馬湖人侍御汝蘭孫也崇禎癸酉舉於鄉順治二年六月江西歸附瑞州亦歸附分宜令曹國祺逃避商盤與志明相結志明念世受國恩思有以報因與豸上妻兄前懷寧令聶棟棟子炬田比武解元王平東灣溪武解元黃橫梅沙舉人李維禎杭頭舉人晏揚勳同起兵新昌僉都御史陳泰來應之復上高新昌寧州弁取萬載迨新昌再失泰來走界埠志明從上高會之敗死衆皆潰維禎不知所終橫別有傳

國朝乾隆五十四年追

郵勝國殉節諸臣志明由是得祀忠義祠云

採明史陳泰來傳及黃鼎燹三事始末



黃樸河西灣溪人舉崇禎壬午科武鄉試順治乙酉江西歸附隆武相何騰蛟開府長沙遣黃朝宣帥滇兵駐醴陵窺江西樸與曹志明起兵應之破上高新昌事詳武事志及志明傳時從兄鼎彝以袁推監紀五營兵復上高新昌人疑樸不當異同樸曰世傑宏範非羣從乎各忠所事而已馬湖之戰志明死黨皆潰散樸走清江高安之反泉收合餘燼有錢簡蕭三姓之衆從之然兵皆烏合無律紀鼎彝使人招之樸曰吾知徒死無益顧與人同事不與之同死何面目見天下乎遂屯兵華陽之雞公嶺以扼會城兵會城兵用鼎彝策急擊之簡某就擒樸與錢某蕭某皆死宜祀忠義

按七姓起兵惟志明之死見明史東泰來傳餘雖同敗實不盡死如聶棟則金王謀叛時尚存事詳三事始末晏揚勲後披緇種松菴事見本志其明徵也若樸走反泉以圖再舉其死事最烈具詳三事始末中雖毗蟬樹多見不量然區區愚忠固不可歿舊志不為立傳殊為掛漏

李凌虹字雲士上京陂東邊人廣州府同知開春孫也幼



嗜古長以才名著時清江陽公廷麟總持風雅徵西江才子集虹持稿謁之首爲噐重學使侯廣成拔置第一南州陳宏緒郭三燧皆折節與之交然凌虹痛念時事雅不欲以文名會陳泰來起兵應曹志明廣行召募凌虹卽帥衆從之泰來遣之攻萬載破其城殺縣令杜章卿泰來敗死凌虹走衡州衡州破凌虹不知所終

舊志載凌虹文苑今據通志武事類中所引楊陸榮雜亂紀增錄

任汲河西六口人拔貢當李凌虹攻萬載汲與焉與萬載

庫吏某善約爲內應遂入之殺令及典史某後兵敗不知所終見三事始末

盧瑜字石公河北岸人崇禎辛巳嘗偕邑人黃鼎燹陳其謨詣闕乞減浮徭里尋以歲貢廷試第一授柳州府同知會流寇犯柳以亂木塞郡南門遏援兵守不知爲計瑜遣人間道走桂林乞師援至圍乃解以功擢思恩知府抵郡上四事謂思邊徼重地城壘坍塌亟宜修築連歲歉收民以田質穀負正供者率逃亡宜蠲舊逋緩新征思郡廣濶苗民雜處當設理苗同知鎮之廣西各郡



重修高唐志卷七  
有惡樹汁滴石成丹以煮箭射人不可治宜詔州縣去其樹疏上報聞順治丙戌永明王監國據有兩廣己丑大兵入桂林永明王自梧州走南寧壬辰走安隆所尋走雲南日益窮蹙而瑜與子融縣論明揆雒容論明挺猶爲固守己亥

大兵下雲南永明王走緬甸廣西諸郡以次畧定或勸瑜降瑜曰人臣事君如子事父天下豈有父亡而復謂他人父者哉遂以是年十月死難明揆則先一月死融縣明挺亦死於雒容但未詳月日志之于此以愧人臣懷二心以事其君者

按舊志缺傳今采盧譜晏侍郎斯盛傳補

國朝

鄭士喜字賡生河北岸人爲人俠烈慷慨尊賢敬士順治元年甲申十一月二十九日張獻忠遣僞官王文直據城喜與黃興恩戴重光沈本濟等陰結勇士三十餘人於十二月初二日計擒僞官閻道解府越一日官兵臨城賊已就滅一城賴以保全咸稱忠義府縣具詳司院總制題叙錄功卒祀忠義祠



黃興恩字覲錫任縣治後與鄭士喜等擒僞官王文直有  
功城社卒祀忠義祠子三桂縣庠生

戴重光字公純河北宣化坊人縣學生苦貧力學屢試有  
聲每談論風生語多慷慨與鄭士喜擒賊有功卒祀忠  
義祠子名奎

沈本濟集賢坊人以公正充鄉約言行恪恭與士喜擒賊  
有功卒祀忠義祠

鄭武字糾臣河北瑤坊人賦性剛直結義擒僞官亦與有  
功卒祀忠義祠

### 孝友

宋

易延慶字餘慶重之孫筠州上高人父贊以勇力仕南唐  
至雄州刺史延慶幼聰慧涉獵經史尤長聲律以父蔭  
爲奉禮郎顯德四年周師克淮南嬪歸朝授道州刺史  
延慶亦授大名府兵曹參軍後爲大理評事知臨淮縣  
乾德末贊卒塋臨淮延慶居喪摧毀廬於墓側手植松  
柏數百本旦出守墓夕歸侍母紫芝生於墓之西北數  
年又生玉芝十八莖本州將表其事延慶懇辭或畫其



芝來京師朝士多爲詩賦稱其孝感服闋以母老稱疾  
不就官母卒後藁殯數年延慶出爲大理寺丞嘗司建  
安市征及母葬有期私歸營葬掩壙而返知軍扈繼昇  
言其擅去職坐免官復廬墓側數年母平生嗜栗延慶  
植二栗樹墓側二樹連理蘇易簡朱台符爲贊美之後  
知瑞州卒祀鄉賢祠子綸大中祥符元年進士及第本  
宋史

張茂修仁團人性純孝端平乙未母董氏病篤割股和粥  
進母病遂愈縣令以聞郡守陳韞贈之金帛以詩詩曰

百行何先惟孝伊始一念克誠神明鑒只時惟上高有  
民張氏曰茂其名性一之嗣割股療親發於天理天棊  
其忱膚全病已事出庭闈善推隣里邑長傳聞郡侯褒  
喜錫以金繒飲之醇醪酌言告之爾惟孝矣我聞聖言  
孝非止此身體膚髮不敢傷毀爾迹若違爾心則是但  
存此心戰兢臨履身立名揚風行俗美永言歌之用勸  
人子旣而嘉熙間割股以療父者曰馮忠孝曰李德勝  
曰聶汝清曰黃顯曰吳應發曰盧十一曰仇大任曰晏  
十二以療母病者曰王文旺曰吳仲三曰雷大年曰劉



信伯曰戈廷秀曰王袞固皆天植自然抑亦聞風興起者歟俱祀孝弟祠

元

李明德河南岸人讀書有志操孝行純篤至正間天完兵陷袁州遂掠上高劫其父欲殺之明德泣告曰子不可代父乎願勿害吾父遂殺明德免其父祀孝弟祠元史

明

游位桂林坊人父斌病脇痛百藥不效位割股以進不踰時痛如脫崇禎十四年按院訪求節孝推官劉起相以聞給性孝天植額同時又有游鵬搏游泮瓏皆割股和藥以愈親疾殆亦聞風興起者歟

國朝

李光遠字非日上京陂東邊人凌虹從兄弟也性至孝母死卜葬於末山麓人迹之所罕至光遠築室於場獨居三年服闋以所居之室爲佛舍藉奉香火供糞除旋補郡庠生食餼詩文秀拔與族舉人凌漢唱和甚多書法亦老健歲時令節必至精舍寫經追薦助冥福焉時稱純孝所著草堂吟稿尙存殘帙



羅景淹字錦章崇本洋田人生有至性歲餘喪父稍長就  
外傳見他兒父命諄諄輒嘆曰吾獨無庭訓耶益自淬  
勵然數試童子軍卒不遇遂絕意進取事母恭謹行必  
稟命偶疾卽通夕不寐無間寒暑母歿廬墓側朝夕哭  
以不得再見爲恨嘗自外至見母坐苦塊中急前趨抱  
忽失所在人謂至孝所感鄉里欲列其行聞有司景淹  
不可後病篤囑其孤葬父塋側以生未逮養故也

李士林字藝園上京陂東邊人邑廩生師事進士晏命世  
試輒高等學使趙大鯨尤器之孝性純篤能曲體親心  
每出輒留戀不忍去以善事囑家人者再四母病醫罔  
效默禱於天割股和藥以進病卽愈事繼母亦無間言  
乾隆間知縣劉逢奇給匾旌之

况佛惠河西大塘人事親一飲食必躬奉曲意承歡父病  
篤持齋默禱割股以進獲痊治家一堂雍睦從無詬詈  
聲又小宗曠祀嘗助貲舉行蓋能推廣此心非專假奇  
節以駭俗者知縣劉逢奇廉其孝以懿行足式額獎之  
次子文運歲貢生候選訓導惠同時族人良昭亦嘗割  
股和藥以療親病例得循舊備書



萬國棟河南籍白土中秀里人邑庠生性至孝七歲父卒  
九歲而生母又卒哀毀如成人事嫡母一飲食必躬親  
奉侍不假手家人妻以細故忤母必欲遣歸賴母堅留  
乃免母晚歲病顛國棟寢食相依不離左右倦恐熟寐  
必使家人更番環侍以防有失如是者數年母卒寢苦  
樞側朝夕上食事亡如存同時有吳宗起者白土上人  
郡庠生事親以孝聞鄉里賢之

處士

元

曾義山一名法興善占術青田劉基丞高安法興過之語  
曰相公聰明絕世而器識宏遠當爲一代偉人吾書盡  
以相贈基遂領其要基見世事日非嘗卽法興家借觀  
乾象諸書法興以原本畀之曰吾不欲留此以爲家禍  
也後明太祖高皇帝嘗問基授受所從基以實對令有  
司爲法興營居室表其墳墓府志

明



劉侃字豫甫元季任瑞州路學正與高安丞劉基奉新胡泰爲友精於易卜世亂棄官家居懸棹爲識號銀河棹與人言吉凶無不立驗迄今業陰陽術者悉祖之洪武初薦任本學訓導至今人稱爲豫甫先生有銀河外編人獲抄本珍藏不顯於世府志

黃思庸河西灣溪人喜吟咏博學多聞縣有大疑難事邑令必造廬請商不樂仕進著有清灣集

黃旭東修仁團人侍郎景之兄也苦心嗜學雖隆冬盛暑手不釋卷與其弟景自相師友居家歲時吉凶率用家

禮父歿履霜哀毀膺寒疾而卒所著有東軒集行

黃彥瑜號樂善邑庠生河西灣溪人志行超羣常與弟彥璋以琴詩自樂又善寫墨竹一時山人墨客皆遊其門黃彥璋號素行河西灣溪人瑜之弟博學好古著有梅軒詩黃姓諸顯達皆其後裔

潘瓊號載謙唐良樓下人嗜古敦行高尚其志以琴書自娛義方訓子秉性仁厚卓有道範

鄭邦偉河北岸人潛心經史工舉子業數奇不遇遂無意功名絕跡市廛終日危坐惟進族之子弟循循誘誨之



閒怡情池沼遊行阡陌知縣歐祖贊贈敖陽儒隱額

况芹字清溪河北岸人初試棘闈即登副榜後屢戰不售遂建百果園於敖峯之麓即今蓮池菴也嘗乘一驢嬉遊山水與里中諸名宿聯詩倡和著有清溪集太平備要集

左文明德義瀚堂人邑庠生家貧勤學困於棘闈平日與人交接敬恭有禮人遇之如春風和氣子肇元能讀父書

潘如瓚字君玉河南岸人邑廩生家貧自甘藷粥雖居城市如在山林博學嗜古崇禎壬午已取中式六十二名發榜時對勘硃墨二卷以墨卷縫印稍斜不對抑置副榜人咸惜之舊劉志

曹桂字九芳馬湖人侍御汝蘭次子穎資博學迥出流輩所交遊皆一時名俊雖處貴介遇單寒下士不以爲嫌乙亥拔俊學使李若愚做科舉試考較三場得桂卷擊節稱賞以策內有宗爺爺李相公數字遂置之舊劉志

况士模字文衡河北岸人博洽典籍尤工詩詞行事耻與俗人伍



重修 高縣志 卷一  
况宗斌字兼之大塘人博覽羣書不屑屑章句惟以吟咏  
自適課兒於時習齋罕與世接子鼎藻邑廩生  
鄭岳字季岷河北桂林坊人秉性端方積學嗜古一時名  
流羣相推許數竒不遇銳意督課門下多傑出者  
盧廷光字育甫河北岸人邑庠生資穎超邁讀書有大志  
處事有明斷凡邑中有疑難事恒折衷之長子荷伯次  
子受伯皆庠生  
傅相河南岸人生而穎異總角應童子試卽廁膠庠後精  
勤不倦庠序有聲數竒不售一時爲之扼腕

國朝

王徽字亦美田北人邑庠生布政使綱之裔也少攻苦自  
勵後以目疾輟業生平剛方自持崇禮尙義課子有方  
長子鼎堅食餼府庠生次子光祖邑庠生

游應乾字象初河北人賦性淳樸托業軒岐不求聞達一  
時英俊莫不仰其高風知縣易道沛贈以匾額次子家  
禧邑庠生諸孫皆習舉子業

趙辰生字元伯河南昭文人性恬而介刻意躬行不求仕  
進少補弟子員奉例辟送入監不赴生平勤思道學究



心性理諸書其居心制行皆有古君子風創別墅於大成橋東曰大成書院課二子以遠就相期暇輒種植花木觴咏自娛年七十終於家長子應對邑增生次子應梅邑庠生

沈敦美字德昌河北岸人襟懷瀟灑行止端方超然塵表自視不減羲皇上人知縣易道沛廉而器之額其廬曰竹溪隱逸子維霖邑庠生

丁灝字仲泓河南人有才名知縣易道沛旌以匾曰望儼人龍子嵩邑庠生

鄭士昌字君寵河北岸人性質實動以禮法自持年二十遊泮手不釋卷中年學益粹親知勸之仕進默不應居城如山林足跡不入公門惓惓以詩書誨後進年八十卒以上皆據舊志

曹焜字晉臣南里馬湖人歲貢生性磊落讀書務明大意不屑屑訓詁學作文汪洋恣肆真氣勃然以明經老未竟所行時論惜之

鄭坦字峻思河北岸人少年嗜學淹通今古時推神童髫齡府試冠軍優等十有四次學使金刻其文迄今膾炙



人口秋闈屢薦庚午 恩貢截取未就常以孝弟忠信  
訓誨孫曹祖孫父子俱膺歲薦卒年八十

黃煥新字中裕號崧嶽蒙安上團儒里人性嚴重不妄笑  
言事繼母如其所生孝敬備至屢薦不售以歲貢生終  
然學老文鉅邑之俊髦多出其門遇貧士來從學者并  
不責俸邑令延為鄉飲大賓八十壽辰知縣劉公逢奇  
以礪石高風匾贈之

黃盛世字泰交後塘團坑溪人歲貢經明行修以授徒終  
老師範尊嚴成就甚眾上鄉諸英俊半出其門 新增

胡揆字藻飛一字摘庭忠城人優增生性沉靜寡言笑室  
中遍粘先哲格言用以自勗行文不事粉飾務闡明經  
義教人先行誼後文章以誠篤相諄切所著有勿欺堂  
閒吟小草摘庭時文稿子學椿己卯科舉人孫芸邑庠  
生

簡禮字學周修仁團人為人性靜簡默好學深思舉動必  
循規矩困膠庠中四十餘年每大小試輒踴躍爭赴至  
老不倦嘉慶庚午科蒙 恩  
欽賜副榜遠近無不推重

恩

人物 處士 六八



羅士超字蔚華號素園崇本洋田人少爲邑諸生期進取年四十患目眚乃援例貢成均以家政自任同祖親屬百餘人率以禮讓皆肅然聽命延師課讀文行交勗遇鄉里是非直言判決人咸悅服性喜義舉凡鄉族若祠堂書院試館陂隄都邑若學宮文塔賓興會諸役皆捐重金爲倡其他善行不勝紀長子安邦嘉慶庚午科舉人次定邦孫運晉運增並邑諸生採辛侍郎從益贈序

敦行

明

李寶鏜藍塘人孝弟力田喜施予高安建石橋捐銀飲工隆慶三年歲大饑鏜出穀三百石備賑鄉人感其德時鏜年九十聞於署縣司李陳應徵贈以恩壽匾今存焉趙順乾號惕菴城南人不樂仕進好施與隆慶間自請於縣出粟賑饑所活甚衆有司以其事聞撫按頻加獎賞奉例贈義官鄉飲禮爲大賓年九十八朝廷給廩餼子孫甚盛登仕版者載初載祐載祿列膠庠者俱有聲



序

黃啟雷字宇霖河西灣溪人邑增生爲人長厚和平喜怒不形於色人以非禮加之能容忍不校志趣高尚嘗與鄉族耆英賡和手談性樂施與賑濟窮乏毫無德色晚生一子栻歲貢生人以爲好善之報

舒聖字惟功全安下人居家孝友分粟以賑族貧輸錢以釋隣爭善行可以範俗子生灝孫士材皆郡庠生

江廷燎崇本人邑庠生居家孝友族中有貧乏者苦追逋廷燎爲之代輸不責償長子開次子泮孫懋俱庠生

况泓字度公城圍人鸚季子郡廩生仗義輕財凡貧乏者叩門稱貸不望其償子翼邑庠生

潘嶽字毓瑞唐良樓下人性嗜學困諸生三十四年事母以孝聞素行端方鄉里咸服其義子瑤庠生

趙家魁字獻甫城南昭文坊人髫齡入泮多俠氣重然諾倡文昌會爲多士觀摩弗竟其用時論惜之子應良邑庠生

黃啟誠字爾思庠生鏞之子秉性剛直事親以孝教子以義時田戶爲磽荒所累不惜多方以賑匱乏所荒田地



令子璧力叩當事獲蠲正賦推官張匾旌之

左士先字寅生瀚堂人持已端介居家以孝友聞因積學未售特倡族人建文昌閣於里中水口以爲後學觀摩之地子希旦希晨俱庠生

任瓚字伯玉河西六口人少失怙勵志攻苦著聲膠庠公直自矢居鄉每以片言解紛人咸服其無私尤好扶植後學五男長濟廩生次汲拔貢三潛四渾皆庠生翰林院檢討際虞陝西商州知州文溥拔貢文津舉人文瀾德明皆其後也年八十卒

潘如瑗字嗣愛文之子孝友端方知縣歐學師張皆舉優行爲士林翹楚奉通判林置買學田造祭器往來經理無倦容衣衿累代不替

鄭立中河北岸人性慈而介屏跡公門荒年出儲周恤貧窶賴以活命者甚衆萬厯丙子知縣劉元輔知府孟紹康上其事按院旌以額子推甫善承先志修橋墩砌官埠施棺槨葬無主之骨卓有父風妻周氏賢而有德同堂貧家產逼改適氏確守不回氏子公履孫煌俱庠生人以爲周氏堅貞之報亦立中父子繼善之報也



左一士字建明瀚堂人少習舉子業喜獵羣書試不遇怡情山水間爲人性長厚樂施與剖事公平有仲連高風崇禎時奉例冠帶

晏美周義城團城溪人明萬厯間輸粟二百石助賑捐銀四十兩修學官里中貧乏者咸賴其周恤奉府縣請給冠帶匾贈尙義可風

鄭志科孝友謙讓行善好施萬厯間按院劉家祥嘉其行給樂善匾額旌之天啟間郡守陶履中舉大賓年八十有二子孫多補弟子員

丁伯燮字思石河南人可大子慷慨尙氣節凡地方有利病不得上請者不惜捐貲致力以身任之必得請乃己李薰號竹舟壽塘人樂善好施歲饑備賑所活無筭撫按廉其義贈綸恩褒德額一時詩賦稱頌者甚衆

况效忼大塘人行履端方好施濟時直指將按部瑞州先期微行訪地方淑慝廉效忼善行可嘉具題旌獎

李傳遠石虬渡人親賢好禮嘗捐貲給濟一方貧乏穀價昂貴出粟平糶全活者甚衆按院吳贈以彰德流芳額任彬號雙溪河西六口人賦性嚴毅待士謙恭一時士大



夫樂與之倡和好施與鄉人待以舉火者甚衆按院吳  
達可訪求碩德闔邑紳士以彬應吳批其牘曰真善士  
也

李存倫號壽山下京陂壽塘下人樂善好施孝友惇睦植  
產業以利族衆興立徐渡市鎮以爲貿遷四境賴焉復  
建清籟書院延師課子巡按吳達可贈有德並香山匾  
子思昭孫彥士際時俱庠生

胡載校河南岸人賓之孫行誼異俗訓子有方知縣陳優  
賜冠帶又以義方碩德匾贈之子覲邑廩生孫濬郡庠

生

沈元奇號左溪河北岸人操行端方偉貌修容望而知爲  
人傑尤好義急公崇師重道崇禎三年署縣王九鼎贈  
達尊有二額子大和大鵬孫日升俱有聲庠序

楊清溪舉子團人操行端方好義樂施貧乏稱貸多不責  
償崇禎三年公舉鄉飲知縣費彥芳旌以德壽兼優額  
傅子文字見洲河西團人樂善循禮德重鄉評崇禎癸酉  
知府馬維陞廉其行誼賜冠帶匾贈商巖遺隱

傅一佐字良輔河南岸人生平端恪有爲凡所建立皆一



時而爲畢世之基知縣蔣克顯旌以燕翼良謨額子倬  
孫琛俱庠生

毛廷明景行團人性慈厚鄉人有事輒爲排解有無相通  
皆不計利知縣蔣克顯舉鄉飲年登百歲龐眉矍鑠子  
天翎孫煌俱庠生

李生祥字慎吾河東人性敦慤而有爲仗義輕財里人有  
急無不周卹之本府推官李蕭上其事按院謝世錦題  
請冠帶給額旌之

喻揚清正全安屏溪人敦行樂善崇禎間知府楊大明疊  
贈懿行式俗厚德流芳額孫之進邑庠生

王時美號繼敖城東集賢坊人性公直樂善散財賑貧乏  
有古傑士之風生四子教以義方及長子基遊庠復令  
立蜚英會交結名流自備貲爲四季會課同里咸多成  
就焉子堡臺皆庠生

鄭元鵬字碧池河北瑤坊人正直公平濟人禮士爲邑中  
興利除害人皆悅服督建省倉以便民兌勤勞有功巡  
道潘魯絃給匾曰爲國宣勞長子邦僑郡庠生孫廷瓊  
邑庠生



况時俊字少橋河北岍人尊賢尚義好善樂施明崇禎丙子年歲荒俊爲設粥賑濟構近聖居於北門嘯歌自適子長邦直幼文偉俱庠生次子文英舉人

左一頤字顧之瀚堂人雅好書史歷練世故凡有功德地方之事知無不爲至於親賢禮士所交遊者甚多晚年怡情花木有高士風子文煌邑庠生

傅文聖字北溪河西里人仁讓克家淳風振俗集名師友與諸子遊有親賢若渴之風天啟間知府樓旌以黃堂嘉賓額子之才邑庠生崇禎辛巳學使侯峒曾額給翰

苑傳芳以彰優行

吳都泉港人持身端謹處世和平崇禎辛巳知縣蒙興楚旌以達尊有二額子寧邑庠生

况學敬仁里團人謹厚守禮教子孫以孝弟力田急公好義不爲風氣所囿誠一鄉善士也知縣蒙興楚旌以望重嘉賓額

潘純字如赤號完初正全安山田人秉性溫厚而涇渭分明雅負知人之鑑習舉子業屢困棘闈事繼母孝撫孤姪慈處鄰里義鄉黨宗族咸以黨正事之時秋陂賊震



重修 高縣志 卷一  
驚地方獨不忍入其境有古王彥方風子宗琦宗璵俱  
庠生季子宗琿歲貢

胡觀字冲字河南岸人邑廩生學問精通志氣遠大兼以  
孝友聞兩舉優行適當貢以丁母憂故未及登俊而卒  
劉啟禎字人瑞河南岸人邑廩生賦性恬淡持身謹恪事  
父母以孝稱學使吳名偉按部以優行獎之

游斌字文甫河北岸人邑廩生性豁達有長者風敦學不  
倦人稱一門桃李長子位以孝行稱次子价邑廩生  
晏揚義字宜之杭頭人邑庠生承祖以清遺業構別塾與

兄揚勳螢窗雪案互相師友己卯兄登賢書遂專精岐  
黃鄉里求方脉者義濟之不計其利子鉉郡庠生

國朝

鄭士升字允吉河北岸人邑增生好讀書少失怙恃依祖  
母奉事盡職人無間言每排難解紛救困扶危不遺餘  
力學使楊按郡教諭季廷灝以優行舉亟獎之

李景宣字子敬東溪人析產時其父以金一囊及書數十  
卷命諸子自取景宣獨取書籍人皆訝之景宣曰昔管  
仲分金多自予人皆不以爲貪况兄弟乎且書中趣味



吾生平所結習也吾雖已矣獨不可畱以訓吾子乎長  
子日生幼子凌霄俱庠生次子凌漢以孝廉負文名

李子昱字宏宇全安端溪人衣冠淳古當明季兵荒族縉  
紳者艾凋謝子昱捐金倡葺祖祠及先代雙桂坊里中  
石橋子姪不能自立者多方扶植之丙戌奇荒竭力賑  
卹或施棺以瘞饑殍迄今子孫蕃衍僉以爲盛德之報  
趙廷謙字六吉河南岸人父早喪事孀母李氏以孝聞且  
敦行不怠年八十無間言知縣張畢宿徐可任疊旌之  
歐陽忠朝好義急公見人危難不吝傾囊濟之歲於濠沙

港仁濟橋煎茶濟渴丙戌丁亥奇荒散粟施棺賴以全  
活者甚衆鄉有慈翁之號年九十七終二子俱庠生

盧明樹字繼堂河北岍人好善樂施諸兄弟早卒樹爲撫  
孤教讀婚配如已子郡庠生璉其一也順治間按院重  
光訪善士府縣列狀以聞有撫藐孤攸叙爨倫濟饑荒  
存活多命之語爲給爲善最樂額旌之子文煥庠生  
鄭子茂河北岸人剛直重義凡親友庚癸之呼輒與之不  
望其償行路之人亦無不被其周卹順治甲午知縣易  
道沛舉鄉飲介賓贈之以額子士杰庠生



劉興鑾號潛菴樂城團人端方古樸足不入城市鄉族有  
急傾囊以應不計償咸稱長者子應騰康熙癸卯舉人  
羅景試字斌甫崇本洋田人敦睦好施兄弟三人伯早卒  
與季友愛弟家落一切服食慶恤諸務不分畛域已所  
創置悉與共里中兄弟不和者必稱景試爲勸遇顛連  
困苦者卽隱助之嘗途見遺金一囊坐守以俟至晚遺  
者踉蹌來詢得實悉以還之其人感謝問姓名終不告  
其行事多類此

李士箕上京陂東邊人忠誠儉樸以力田起家然念家世

讀書築壺月軒以教子弟鄉里賴以成就者甚衆性慷  
慨好施祖祠遭回祿獨力創建兼倡置祭產爲奉祀資  
晚年修築環水菴前兩橋工竣令適行部至其地詢知  
祖父皆忠厚因書世德作求額貽之子賡堯邑庠生受  
父所分遺產不增絲毫節儉所遺悉以力行善事蓋能  
世其家云 據家傳

鄭希望字尙父河北岸人淳謹端方精簿書錢穀邑利弊  
藉以無訛事關民瘼知無不言當事擇者宿可表鄉俗  
者邑咸推之康熙癸卯知府楊朝公以表正一鄉額贈



之

舒宏全安唐富人端方謹厚輕財好施凡鄉族有忿爭者多方排解一鄉皆稱述之不置

李芳時河南岍人簡默多智慮諳練機宜明末藩司考選掾曹縣以時應尋復舉入申明亭秉正不阿邑利弊直陳無隱府縣疊賜匾贈有表正一鄉齒德兼隆之譽

李秉槐下京陂石虬渡人幼業儒學雙江詩畫恬淡自樂家稍裕好善樂施常積穀以遺匱乏不責償一方賴之府縣累給額以旌

冷裕昆字懋垂景行人監生樸直寡言笑勇於爲義乾隆戊戌饑散錢賑乏月費鉅金自是每遇饑輒炊粥以施有黠者集不逞之徒擾鄉里裕昆具牘訴於令令疑非實將論誣里紳知其所訴公助之訟事得直黠徒解散鄉里安之其他濟急扶傾亦世之敦古道者焉

楊履泰字坦來號安圃河北宣化坊人以優廩貢成均博學能文事繼母得其歡心暮年淡於科名築半覺軒課子姪讀書自樂雖居城市不輕入公門尤多義舉郡邑學宮就圯捐金助修經理不辭勞瘁嘗建本坊義倉以



備荒賑清查義渡庄田公其出入至今賴之邑建大觀  
 塔元回閣以鎖鑰東流時履泰年已七十首捐二百金  
 且日往督理工作好義之篤老而不倦云  
 李幹秀字茂挺號勁齋河南岸人弱冠補弟子員雅慕古  
 文詞不趨時好居勵志操動必以禮尤慷慨好義郡邑  
 修建學宮試院及明倫堂躍錦橋諸大役皆捐金為倡  
 晚年孫曾繞膝五世同堂人以為利濟之報  
 况士玉字汝成號琢堂河西大塘人國學生性孝友居嘗  
 與伯仲二兄長枕大被談笑達旦至老尤篤謂餘皆易

得惟兄弟最難耳仲兄無祿撫孤成立視若己出尤仗  
 義疎財凡興學校修橋梁諸義舉咸樂成其事鄉里有  
 爭片言輒解以從無一字挂訟牒故人信而服焉嘉慶  
 五年公舉介賓子列膠庠孫大經選貢生  
 鄭鴻遠河北岸人貢生性廉介喜施與乾隆丁丑歲飢米  
 貴請糴他境價始平先是躍錦門外值山漲暴發問渡  
 者苦無舟楫鴻遠請其先人啟宇首捐重金創立義渡  
 南北往來者至今賴焉知縣華西植匾旌好義可風  
 羅允哲字青遠崇本洋田人監生篤厚耿介有守士也嘉



慶七年邑修學宮允哲董事四年出納會計皆出其手  
歲事泐籍告遠近人無間言家故中產既常川在局不  
能兼顧以此重困致鬻產償逋負卒無怨色士論多之  
李則字孝思葛步人大學生性恬淡不樂仕進樸直長厚  
見人一行之善輒稱道不去口有不善亦未嘗面諛所  
行必期有濟於人尤篤於姻族卒年八十四  
熊維慶字錫光幼性淳謹祖父咸器之長入成均益敦崇  
禮讓輕財喜施與年八十餘延師課孫曾不倦鄉里稱  
其髦而好禮者焉

### 寓賢

晉

陶潛字淵明一字元亮潯陽柴桑人義熙元年令彭澤八  
十餘日不堪吏職解綬去生平有高趣博學善屬文著  
五柳先生傳以自況時人謂之實錄初嘗家於邑境今  
義鈞鄉有淵明故宅讀書堂石室藏書柳洗筆巖諸遺  
蹟按地可稽

唐

盧肇宜春人舉會昌三年鄉試入京獻書侍郎王起知貢



重修高縣志 卷十  
舉遂擢第一授潼關防禦判官初肇之未舉也李德裕  
謫州長史殊遇肇後肇應進士德裕復入相肇至曰吾  
喜爲今榜得狀元矣遂魁天下然肇雖受裕知絕無倚  
附久之使相盧商太尉裴休左僕射盧簡求先後奏辟  
從事累官集賢院學士持節歙州諸軍事移鎮宣池二  
州遷吉州刺史卒著有文標集

按舊志誤載邑人今加考正然其墓實在望蔡鄉模  
塘尾其子姓聚族居意肇固嘗居於是者遂移錄於  
此

宋

蕪轍字子由嘉祐進士元豐中謫監筠州鹽酒稅嘗經遊  
至邑多所題詠今存息軒起亭兩詩載藝文

岳飛字鵬舉湯陰人紹興元年李成將馬進陷筠犯洪連  
營西山張俊請飛同討飛曰賊貪而不慮後若以騎兵  
自上流截生米渡出其不意破之必矣請自爲先鋒重  
鎧躍馬潛出賊右突其陣所部從之進敗走筠州飛抵  
城東賊出城飛設伏選騎二百而前賊易其少薄之伏  
發進敗走成聞進敗自引兵十萬來飛與遇於樓子莊



大破之復筠州二年賊曹成擁衆十餘萬由湖湘據道  
賀二州命飛平之飛至上高圍聚鄉兵教以守禦今邑  
鄉區尙以圍名

元

吳澄字幼清撫州崇仁人以所居草屋數間程鉅夫題曰  
草廬學者遂稱爲草廬先生先生身若不勝衣正坐拱  
手氣融神邁答問疊疊使人渙若冰釋早以斯文自任  
故出居朝署退居於家與郡邑之所經由士大夫皆迎  
請執業嘗至邑留居蒙山爲作正德書院記記載藝文

明

劉基字伯溫青田人至順間進士丞高安縣以廉節著發  
奸摘伏不避強禦以讜直聞江西行省辟爲掾遂去明  
興以翊運功封誠意伯當爲丞時與邑魯義山嘗相過  
從有葫蘆洞授銀河鈔故蹟

鄒守益字謙之正德六年進士授編修假歸謁王守仁講  
學於贛州宸濠反與守仁軍事世宗卽位始赴官嘉靖  
三年帝欲去興獻帝本生之稱疏諫忤旨謫廣德州判  
稍遷禮部郎尋引疾後以荐起累官祭酒九廟災守益



重修高縣志卷七終  
陳上下交修之道帝怒落職歸日事講學以獨知爲良知以戒懼慎獨爲致良知之方姚江衣鉢賴以不墜學者稱東廓先生嘗講學邑西末山九峰一時從遊羣沐甄陶若李南川其最著者也

重修上高縣志卷七終